

Viiddiduvvon sámi sisdoallu joatkkaskuvlla oahppospesialiserema oahppoprográmmas

Joatkkaskuvlla oahppospesialiserema oahppoprográmmas fálojuvvo odne dušše okta sámi prográmmafága mas lea vejolašvuohta čieknjudeapmái, sámi historjá ja servodat.

Fágaodasmahttima bokte lea árbevirolaš máhtu sadji sámegielfága odđa oahppoplánain unnit go dálá plánain. Dan oktavuodas livččii lunddolaš hábmet oktan joatkkaskuvllaiguin nuppi sámi prográmmafága, sámi árbevirolaš máhttu.

Sámi árbevirolaš máhttu hukse sámi árvvuid ja filosofijaid. Dilli lea odne nu ahte árbevirolaš máhttu lea jávkamin ja stuorra álbmoga árvvut ain báidnet sámi árbevieruid. Lea deatalaš revitaliseret máhttu ja maddái transformeret odđa áigái ja servodahkii.

Árbevirolaš máhttu sáhtta maddái leat mielde giela revitaliseremin. Nuoraid giellageavaheapmi lea njedjan sihke vuosttaš- ja nuppegielagiin. Viiddit fálaldat ja sisdoallu dego árbevirolaš máhtu sáhttet movttiidit nuoraid sámástit.

Nuorat buolva lea odne ollu eanet dihtomielalačča luonddugáhtten ja -jurddašeami ektui, dáid beliid fátmasta sámi árbevirolaš máhttu. Fága bokte besset nuorat teorehtalaččat ja praktihkalaččat oahpat árbevieruid, luondduáddejumi ja luondduávkkástallama. Fága lea sihke ávkkálaš ja geasuheaddji.